

SAN PABLO CARTA E'SU FI'JNI TESALONICA CHJAMBTEWE'SH JÏI

Tesalónica chjambte Dyus yacj fi'nzesawe'shtyi Pablowe'sh fi'jni

1 ¹ Pablo yaasesa naa carta's fi'jatstju Silvano vite' Timoteo tyāawe'sh yacj, yacjtjē'jwe'sh Tesalónica chjambte pcjaacjena üssawe'shtyi wechana. I'cue'sha' Dyus cue'sh Tata vite' cue'shtyi jype'jsa Jesucristo tyāawe'sh yacj tyutemée wala ew fi'nzena üsi'cue. ²I'cue'shtyi' Dyusa' pu'chjina vite' cue'shtyi jype'jsa Jesucristo, tyāa pa'ga Dyus yacjrráa mfi'nzewe.

Cristo' shawendna quíjrra Dyusna nwēese'jsameewe'shtyi castigaína

³Yacjtjē'jwe'sh, i'cue'sh pa'gate pejca Dyusa's wechawa'j ji'pj yujtja'w, tyā'wē yūuni' cyulsame' naa pa'ga. Tyāa pa'gatey i'cue'sh üusuj Dyusa's yaacynisa' een isa jwee írráa walaana u'juetsa', naapcachja' teechsa na'wērraj puuty ya'peeygájna fi'nzewa'jva jwee írráa pejnana u'juetsa'. ⁴Tyāa pa'gatja'w cue'sha' msuuva Dyus luuch pcjaacjena üsnisu wēt wechana pta'shi' i'cue'sh ew fi'nzeni's. Tyā'wē yuucajnii i'cue'sha' tyacue wala pcyuuni yajtsena üsrrava, Dyus yacj jypumbamée fi'nzewa'j yu'sa' wa'lmeei'cue áate caavya'ja'ja'. ⁵Dyusa' iiméj wala ewsa' na' tyāasa ne' tyā'wē ew fi'nzewa'ja's i'cue'shtyi caavya'ja'ja', tyāa pa'ga i'cue'sha' pcyuuni yajtsena üsrrava tyajy jycaajna üsnite pa'jwa'jsai'cue.

⁶Nava i'cue'shtyi pcyuusáa yuutyi' ca'tuva Dyus castigāyni yuj yuutyna, ⁷sa' i'cue'sh ñuste fi'nzesa yuutyi' jycaasewa'ja's üsuna cue'sh yā'jrra, tyā'wē Jesucristo' tyajy angeleswe'sh yā'jrra cielujū quíjrra, ⁸Dyusna nwēese'jmeerra cue'shtyi jype'jsa Jesucristo's pta'shni'sva nwēese'jsameety castigāyya' seena' ipy wala yacj quíjrra tyā'wē cue'shtyi jycaasewa'ja's üsuna. ⁹Tyāawe'shtyi' Dyus jycaajna üsni tashu tyujnderra

bagachte yujva peena yu' Dyus yacj puuty uywa'lmeete ñuste castigãyni yuutyna. ¹⁰Naapcachja' na'wẽ cue'sh pta'shni's i'cue'sh jyucaysa jypa'gai'cue tyãa yã'jrra vite' Dyus luuch jyucaysa yacj wala wechana Jesucristo's jypa'gasa yuune'cue tyajy shawendna quii ente'.

¹¹Tyãa sũjrratja'w i'cue'sh pa'gate Dyus yacj puuty we'wena nes yu', Dyusa' i'cue'shtyi pa'yayã'jrra' tyajy cusete jype'ljna nes yuucajn. Sa' tyã'wẽy Dyus yacj puuty we'we'tja'w, Dyusa' i'cue'shtyi peeygãawa'ja's pu'vitumée cytey yuurra tyãa yacj jypumbamée fi'nzewa'ja'sva jyuca pu'chcajn, ¹²cyaj cue'shtyi jype'ljsa Jesucristo's tuutje'ljsa yuune'cue, naapcachja' i'cue'sha' Jesucristo tuutje'ljni yuune'cue naasãa cue'sh Dyus vite' Jesucristo peeygãapa'ga yuurraa.

Teech pitstjê'j iiméj seena' canzh pcalsa vyaana

2 ¹Nava ãchja' cue'shtyi jype'ljsa Jesucristo cue'shtyi pcjacjya' quiiwa'ja's pta'shitstju, yacjtjê'jwe'shtyi wala neewe'wena. ²I'cue'sha' tjëymée yu'ptjejna üsnuwe, isa yujváana sũjna ücjna, tyã'wẽ Jesucristo quiiwa'l ena' ãjyã'cj jini's, meerrava Dyuscu vyaarra tyã'jicaja' jiváatyna, meerra' Pabloc tyã'wẽ pta'shcaja' jiváatyna, nmejte' cartava cue'sh fil'jni na'wëysarrava íshiinisa pa'javáana. ³Nava wej yujva jypumbanuwe íshiini's. Tyã'wẽ jypumbacajmén Cristo quiiwa'l en ãjmeyna nyafyte' Dyusa's uy wëemée ajtserra tyãa yacj puiiwa'l en cjuë'y u'puna, naapcachja' teech pitstjê'j echtjê'j na'wëy iiméj seena' canzh pcalsa infiernote acjni yuuwa'jsava vyaana. ⁴Tyã' quijnava jyuca atsesa yuuna Dyus yase's cysuusni yu'sa', sa' dyuus yatte u'carra cachjiina, andya' Dyustju jina jycaajya'.

⁵Andya' cytee i'cue'sh yacj nee üsiy pta'shtju tyã'wẽ Dyusa's atsesa pa'ljwa'ja's, atsa' ¿yaaqui'tsmeecue'? ⁶Tyã'wẽ yúuwa'l en ãjmeyna, tyãa ewmeesa casejwe'shte quij tyã'wẽ yupna üsteva tyã'sa' jii i'cue i'cue'sha'. ⁷Tyãa ewmeesa' paatste mjiiina yã'l üsa', atsa' naasãa tyãa ewmeesa's yupna neewesa's cutyi'ljwa'jrráa yã'l peejya'. ⁸Tyãjü isa tyãa ewmeesa' äate vyaana, nava Jesucristo' tyajy we'wenijurráa naa dundte icjena, sa' peena yu' caavya'ljalmeena eena' cweetjna quini yacj. ⁹Tyãa canzh ewmeesa' echtjê'j caajni tyã'wẽ pa'ljana, tyãasa quim yujva ajanimeesa's caavya'ljaljana íshiina caypumba'ljna. ¹⁰Sa' Dyus yuwe isasa's pta'shni's jypa'gasameetyi' tjëymée caypumba'ljana ewmeesarrá's caavya'ljaljra. ¹¹⁻¹²Tyã'wẽ Dyus yuwe isasa's pta'shteva jypa'gamée íshiina pta'shnirrá's nwëese'pja'ga, Dyusa' tyãawe'shtyi' jypumbacajn nviituna vituwa'ljsa yuucajn.

Ewte neeyúuwa'jsaty Dyus tyjityjnisa

¹³Nava cue'sha' bagachteva Dyusa's wechawa'l jil'ptja'w i'cue'sh ew fi'nzepa'ga. I'cue'sha' Jesucristo peeygãanisai'cue, tyãa pa'gatey Dyusa'

nyafiitey tyjityjcu i'cue'sh ewte neeyũuwa'lsaty, atsa' Dyus Espiritu' pcal ji'pjmeesac vitna pa'j yuwe ewsa's jypa'gapa'ga. ¹⁴Tyã'wẽ yuuya'c Dyusa' pa'ya yuwe ewsa cue'sh pta'shpa'ga, cyaj cue'shtyi jype'jsa Jesucristo ũsnite pa'jya' ãjacajn.

¹⁵Tyãa pa'ga, yacjtjẽ'jwe'sh, wej yujva jypumbamée meswe, na'wẽ i'cue'sh yacj ũsrra caapiya'tja'w sa' cartateva fi'jna pta'shtja'w tyãaty pechcanamée. ¹⁶Cue'shtyi jype'jsa Jesucristo vite' Dyus cue'sh Tata peeygãjrra bagachte yujva ptsuwa'jmée wechana ũswa'ja's ũscu ¹⁷tyãa i'cue'sh ũustyi chjãachja'jana, atsa' quĩjva ewrráa yũuna fi'nzene'cue, we'wewa'j ma'c yuu nava ewsarrá's puuty we'wena.

Dyus yacj mpuutywe'wewe cue'shtyi neewe'wena

3 ¹Nmejte', yacjtjẽ'jwe'shtyi na'wẽtj neewe'we': I'cue'shva ma'wẽcue Jesucristo pta'shni's wechana jypa'ga tyã'wẽy msuuwe'shva jypa'gacajn Dyus yacj mpuutywe'wewe cue'sh pa'gate, ²cyaj nasa ewmeesa cuseju iyu'nja'w. Tyã'wẽme' jyucaysa yu' Dyusa's yaacysameeta'. ³Tyã'wẽteva Jesucristo' bagachte yujva i'cue'shtyi' nvijtmée ewmeejũ nwe'wena chjãachja'jana. ⁴Cue'sh pta'shni's na'wẽ yũuna ũsi'cue tyã'wẽrráa nes yuucajn Jesucristo' pu'chjina sũju'tja'w. ⁵Sa' Dyus peeygãani's pechcanamée yaacycajn, Jesucristo' caayaqui'jna nes yuuna tyãa na'wẽy chjãchja fi'nzeczajn.

Mjĩiwa'j ji'pja'

⁶Yacjtjẽ'jwe'shtyi Jesucristo jycaajni's neewe'wetstja'w: maa yacjtjẽ'jva mjĩimeena sa' cue'sh caapiya'jni'sva cytey yuumeena atsa' tyã'wẽsa yacja' pcjaacjenuwe. ⁷I'cue'sha' jii i'cue cue'sha' ma'wẽ yũuna fi'nzesateva. Cue'sha' i'cue'sh yacj ũsrra', mjĩimée yu' fi'nzemeetja'w. ⁸Sa' ũ'a's ducjmée yu' fi'nzemeetja'w, wejyva en ma'c yuu cus ma'c yuu nava wala chjãchja mjĩitja'w i'cue'sh maa yujtyva tjãasya'mée. ⁹Tyã'wẽ yũu wẽemeevatsa', cue'sha' i'cue'shtyi pu'ch tjãasya' ajawa'lsatja'w yu'. Nava tyã'wẽ pu'ch tjãasmée mjĩitja'w, i'cue'shva cue'sh na'wẽy yũuna fi'nzeczajn. ¹⁰Tyã'wẽ yũucajmenĩ cue'sha' cytee ũsrra' na'wẽ yũuwa'ja'stja'w nvijt: Mjĩiya' wa'lsa', ũ'wa'jme' jĩna. ¹¹I'cue'sh yacj ũssa maai' yu' quĩj yujva mjĩimée ewmeerráa fi'nzena yuwe csuusujna fi'nzewa'ja'srráaty yaaqui' jĩnaty pta'shi'. ¹²Jesucristo jycaajni'stja'w juuna' we'wena jycaaja' tyã'wẽ yũusatyi', cyaj tyãawe'sha' chjãchja mjĩirra peecy ũ'wa'ja's uyuutyna.

¹³Yacjtjẽ'jwe'sh, i'cue'sha' ew yũuwa'j yu'sa' wa'lnuwe. ¹⁴Meerra' maai' yu' cytey yuumeeváatyna na'jĩna fi'jatstja'w tyã'sna atsa' maa tyã'wẽ yũusateva ew jiyurra, tyãa yacj pcjaacjenuwe, cyaj tjaameetyna. ¹⁵Nava puuisáa na'wẽ yu' yuunuwe, wejyva zhichcue myu'cypejwe, ma'wẽrrava yacjtjẽ'ja' naa pa'ga.

Dyus yacjrráa fi'nzewa'ja's neewe'weni

¹⁶Cue'shtyi jype'jsa Jesucristo' i'cue'sh wēt fi'nzewa'ja's ūsuna bagachteva, ewrráa caafi'nze'jna. Dyus yacjrráa mfi'nzewe.

¹⁷Pablotj tyā'wē wechana fi'ja' andy cuseju. Andy cartatyi' tyā'wērrarráatj andy yase's qui'pna fi'ja', tyāasatj na'snava tyā'wēy fi'ja'.

¹⁸Cue'shtyi jype'jsa Jesucristo' pu'chjina i'cue'sh jyucaysaty.